

Djadumingu di dos dia di Pasku

SIMADAN DI PASTÓ TA UN TRADISHON HOPI BIEU

KRALENDIJK -- Djaluna 6 di aprel awor, dos dia di Pasku di Resurekshon, tin e tradishonal Simadan di Pastó(r) na Rincon. Relashoná ku esaki Pader Ivan ta invitá un i tur na un Sakrifisio di Misa pa 9or di mainta na parokia San Luis Beltran na Rincon. Despues di misa por kumpra kuminda i kos di boka dushi, chukulati, dèdè, tèrt etc. Riba e dia aki lo tin tambe parti di mèrdia, benta di kuminda krioyo. Pa 5or di atardi tin wapamentu den kayanan di Rincon ku lo kaba riba plenchi di misa. Riba plenchi di misa lo sigui wapa te 11or di anochi.

Simadan di Pastó tabata konosí solamente den e parokia di Rincon. No tin evidensia ku tabatin e simadan aki den otro parokianan. Tabatin simadan sí lógikamente, pero no kaminda ku e hendenan tabata reuní dilanti misa pa selebrá fecha di kosecha òf pa hasi ofrendanan na misa.

Na Rincon tabatin mas plantamentu i mas folklor. Ademas ta konosí ku e habitantenan di Rincon tabata mas pegá na nan religion katóliko ku otro barionan. Mainta durante misa mayó kunukeronan tabata entregá un parti di nan kosecha na misa di Rincon. Pastor tabata warda e kosecha aki den e edifisio pa nort di misa. E tabata usa e kosecha pa parti pa hendenan den nesesidat.

E kantikanan prinsipal di simadan tabata Remailo, Huremailo, Dan Simadan i Belua (Beluchi). E palabra 'mailo' ta nòmber afrikano di maishi chikí. Te awe e nòmber mailo ta usá den hariña di maishi chikí ku Merka ta eksportá. Ta skirbié komo 'milo'.

E parada di simadan tabata sali for di kunuku bai kas, na unda tambe hopi bes tabatin un mangasina. Na Rincon ainda na diferente kas por mira e mangasinanan aki. Pues, banda di un mangasina na kunuku, na unda hopi hende tabatin na bibá, tabatin un mangasina. Pero esnan ku tabatin kas tabatin tambe mangasina pa warda nan maishi.

Den pasado e mihó kantadónan di simadan di Rincon tabata hende muhé. Algun nòmber tabata Servania (Shon Ban) Mercera, Julita (Shon Hulita) Inias-Goedgedrag, Regina Anthony, Carmen St. Jago. Hende hòmbènan ku a bira konosí den kantamentu di simadan tabata Felipe St. Jago, Nemensio Winklaar, Ana Thodé i algun otro mas.

Na kas e simadan tabata sigui. Bebida i ko'i kome tabata pòrnada. No tabatin hasiment'i negoshi manera awendia. Tur hende tabata wapa den tera i gosa di e simadan. Fiesta tabata sigui te lat anochi. I na momentu ku simadan kaba e doño tabata instruí e tokadónan pa toka e kantika: "Bon nochi, te mañan".